

EFNI:

Rafræn sjúkraskrá og samræmd skráning bls. 1

Heilbrigði og líðan barna og unglinga á Norðurlöndum 2011 bls. 1

Ritstjórn

Sigríður Haraldsdóttir
sviðsstjóri, ábm.

Hildur Björk Sigbjörnsdóttir

Ritstjóri

Jónína M. Guðnadóttir

EMBÆTTI LANDLÆKNIS HEILBRIGÐISUPPLÝSINGAR

Barónsstíg 17
101 Reykjavík
Sími: 510 1900
Bréfasími: 510 1919

Netfang: mottaka@landlaeknir.is
Veffang: www.landlaeknir.is

Heimilt er að nota efni þessa fréttabréfs, sé heimildar getið.

RAFREN SJÚKRASKRÁ OG SAMRÆMD SKRÁNING

Þann 1. mars 2012 var flutt til Embættis landlæknis ábyrgð og yfirumsjón með öllum þáttum sem lúta að sjúkraskrá á landsvísu, þ.m.t. þróun og framkvæmd rafrænnar sjúkraskrár og rafrænna samskipta og samræmd skráning heilbrigðisupplýsinga.

Verkefnum sem tengjast rafrænni sjúkraskrá og samræmdri skráningu verður sinnt af heilbrigðisupplýsingasviði og falla þessi nýju verkefni vel að þeim verkefnum sem þar voru fyrir. Innan sviðsins er að verða til sérstök starfseining sem mun sérhæfa sig í þessum verkefnum. Embætti landlæknis leggur áherslu á sterka og formlega aðkomu fulltrúa notenda í áframhaldandi uppbygginu og þróun rafrænnar sjúkraskrár á landsvísu. Til þess að tryggja aðkomu þeirra verða á næstunni kallaðir til fulltrúar notenda til þess að taka þátt í að skilgreina verkefni og forgangsraða þeim bæði nú og í framtíðinni.

Við flutning þessara verkefna flutti einn starfsmaður, Guðrún Auður Harðardóttir, frá

velferðarráðuneyti til Embættis landlæknis. Það er mikill fengur af því að fá hana til liðs við embættið og auðveldar hann flutning verkefnanna. Fjöldmörg verkefni eru nú í vinnslu er varða rafræna sjúkraskrá og eru þau mismunandi langt komin. Embætti landlæknis tekur við þeim þar sem þau eru stödd og leiðir þau til lykta. Fjöldmargar beiðnir liggja fyrir um ný verkefni á þessu sviði og verður unnið úr þessum beiðnum með formlegum hætti á næstu vikum og mánuðum.

Landlæknir fagnar því að þessum gríðarstóra og mikilvæga málaflokki hafa verið fundinn framtíðarstaður hjá Embætti landlæknis. Miklu máli skiptir að þessum verkefnum miði hratt og vel og að um þau náist samstaða. Starfsfólk embættisins mun leggja sig fram um að sinna málefnum rafrænnar sjúkraskrár og samræmdrar skráningar af fagmennsku.

Sigríður Haraldsdóttir

HEILBRIGÐI OG LÍÐAN BARNNA OG UNGLINGA Á NORÐURLÖNDUM 2011

Árið 2011 lagði Lýðheilsustöð (nú Embætti landlæknis) spurningalista fyrir foreldra barna á aldrinum 2–17 ára. Var það þáttur í samnorrænni rannsókn sem stýrt er af Norræna lýðheilsuháskólanum í Svíþjóð. Rannsóknin er framhaldsrannsókn sem einnig var gerð árin 1984 og 1996. Einhverjar breytingar hafa orðið á spurningalistanum þó að reynt hafi verið að halda tilteknum grunnspurningum óbreyttum svo að hægt væri að bera saman svör milli ára.


Rannsóknin á Íslandi náði til 3200 barna á aldrinum 2–17 ára. Börnin voru valin með slembiúrtaki úr þjóðskrá, um 100 stúlkur og 100 piltar á hverju aldursári. Eftir útsendingu spurningalista og ítrekana til foreldra

barnanna kom í ljós að spurningalistar 88 barna skiluðu sér aldrei til foreldra. Þessir foreldrar höfðu því aldrei tækifæri til að svara spurningalistanum og voru börn þeirra fjarlægð úr úrtakinu. Í endanlegu úrtaki voru því 3112 börn. Alls bárust útfylltir spurningalistar fyrir 1523 börn og var svarhlutfallið 48,9%.

Í spurningalistanum er spurt um ýmsa þætti sem varða heilsufar og líðan barnanna og er þar meðal annars notaður alþjóðlegur listi um styrk og vanda barnanna (SDQ-Ice). Einnig er spurt um athafnir barnsins og notkun og ánægju með heilbrigðisþjónustu svo nokkur dæmi séu tekin.

Langflestir foreldrar eru annaðhvort frekar eða mjög ánægðir með aðgengi barna sinna að heilbrigðisþjónustu (77,4%).

Embætti landlæknis hvetur rannsakendur og nema í framhaldsnámi til að kynna sér rannsóknina nánar.



Mynd 1. Ánægja/óánægja foreldra með aðgengi barna að heilbrigðisþjónustu.

Hér að ofan má sjá mynd sem sýnir hvernig foreldrar svörðu spurningunni: „Hversu ánægð/-ur eða óánægð/-ur ert þú með þau samskipti sem þú hefur átt við heilbrigðisþjónustuna vegna barnsins síðastliðna 12 mánuði hvað varðar aðgengi að þjónustu?“


Niðurstöðurnar sýna að langflestir foreldrar eru annaðhvort frekar eða mjög ánægðir með aðgengi barna sinna að heilbrigðisþjónustu (77,4%). Ef sama spurning er greind eftir aldri barna má sjá nokkuð mismunandi niðurstöður. Þannig eru foreldrar 2–5 ára barna líklegri til að svara því til að þeir séu frekar eða mjög ánægðir með aðgengi að heilbrigðisþjónustu. Þessi ánægja er eitthvað minni hjá foreldrum eldri aldurshópa og minnst meðal foreldra 13–15 ára barna. Á hinn bóginn eru foreldrar barna eldri en 5 ára líklegri til að hafa merkt við „veit

ekki“ eða „á ekki við“. Hugsanlega er hluti skýringar fólgin í því að hluti af yngsta aldurshópnum er í reglubundnu eftirliti í ung- og smábarnavernd.

Þessar tölur eru örlítið dæmi um þær upplýsingar sem finna má í gögnunum um heilbrigði og líðan norrænna barna 2011. Embætti landlæknis hvetur rannsakendur og nema í framhaldsnámi til að kynna sér rannsóknina nánar og athuga hvort gögnin geti nýst þeim í lokaverkefnum eða greinarskrifum.

Gott aðgengi er að íslensku gögnunum úr rannsókninni en það er lengra ferli að fá aðgang að samnorrænu gögnunum. Þeir sem hafa áhuga á að vinna úr gögnum rannsóknarinnar geta snúið sér til embættisins og fengið leiðbeiningar þar að lútandi.

Jenný Ingudóttir



Mynd 2. Ánægja/óánægja foreldra með aðgengi barna að heilbrigðisþjónustu, eftir aldri barnanna.